

四庫全書

經部

欽定四庫全書

經部

御製律呂正義後編卷一百二

詳校宮闈學宮禮樂部臣鄭奕奉

洗馬臣王坦修覆勘

總校官編修臣王燕緒

校對官中書臣陸湘

騰錄監生臣楊正邦

欽定四庫全書

御製律呂正義後編卷一百一

樂章考九

郊祀

金

元

明

金郊祀樂章

金初得宋始有金石之樂然而未盡其美及乎大定
明昌之際日修月葺粲然大備大定朝太常議按周
禮大司樂凡樂圜鐘為宮黃鐘為角太簇為徵姑洗
為羽雷鼓雷鼗孤竹之管雲和之瑟雲門之舞冬至
日至地上之圜丘奏之若樂六變則天神皆降可得
而禮矣六變謂六成也唐宋因之蓋圜鐘夾鐘也用
為宮者以上應房心有天帝明堂之象也宮聲三奏

角徵羽各一奏合陽之奇數欲神聽之也凡樂起于陽至少陽而止圜鐘自邠至申其數有六故六變而樂止則天神皆降可得而禮也樂曲之名唐以和宋以安本朝定樂章宜皆以寧製名制曰可遂命學士院撰定郊祀樂歌如左

金郊祀樂歌

案金史樂志曰世宗大定十一年從太常議謂今止有太廟祫享樂曲而郊祀樂曲未備遂以寧字新製

樂歌皇帝入中壝用昌寧之曲降神用乾寧之曲仁
豐道洽之舞皇帝盥洗用昌寧之曲皇帝升壇登歌
用昌寧之曲昊天上帝奠玉帛登歌用洪寧之曲皇
地祇用神寧之曲配位太祖皇帝用永寧之曲司徒
迎俎用豐寧之曲昊天上帝酌獻登歌用嘉寧之曲
皇地祇用泰寧之曲配位太祖皇帝用燕寧之曲文
舞退武舞進用咸寧之曲亞終獻用咸寧之曲功成
治定之舞皇帝飲福登歌用福寧之曲徹豆登歌用

豐寧之曲送神用乾寧之曲凡十六章

皇帝入中壝用昌寧

黃鐘宮

袞服穆穆臨於中壝瞻言圜壇皇皇后帝裡祀肇稱馨
香維德爰暨百神於昭受職

降神用乾寧

圜鐘為宮黃鐘為角太簇為徵姑洗為羽圜鐘
三奏黃鐘太簇姑洗皆三奏調並同

我金之興皇天錫羨惟神之休爰茲郊見有玉其禮有牲其薦將受厥明來寧來燕

皇帝盥洗用昌寧

黃鐘宮

因天事天惇宗將禮爰飭攸司奉時蠶洗浥彼注茲迺升壇陞先事而虔神勞豈弟

皇帝升壇登歌用昌寧

大呂宮

相在國南崇崇其趾烝哉皇王維時泣止至誠通神克
禋克祀於萬斯年昊天其子

昊天上帝奠玉幣登歌用洪寧

大呂宮

穆穆君王有嚴有翼珮環鏘然圜壇是陟嘉德升聞馨
非黍稷高明降監百神受職

皇地祇用神寧

肅敬明祇躬行奠饗其贄維何黃琮制幣從祀羣靈咸

秩厥位維皇能饗允集熙事

配位太祖皇帝用永寧

肇舉明禋皇天后土皇祖武元爰作神主功昭耆定歌
以大呂綏我思成有秩斯祐

司徒迎俎用豐寧

黃鐘宮

穆穆皇皇天子躬祀羣臣相之罔不敬止俎豆畢陳物
其嘉矣馨香始升明神燕喜

昊天上帝酌獻登歌用嘉寧

大呂宮

郊裡展敬昭事上靈太尊在席有配斯馨酌言獻之靈
其醉止福祿來宜以答明祀

皇地祇用泰寧

袞服穆穆臨彼泰折於昭神宮埋幣瘞血爰稱匏爵斟
言薦潔方輿常安扶我帝業

配位太祖皇帝用燕寧

烝哉高后肇迪丕基功與天合配天以推薦時清旨孔
肅其儀來寧來燕福祿綏之

文舞退武舞進用咸寧

黃鐘宮

奉祀郊丘雲門變舞進秉朱干停揮翟羽於昭睿文復
肖聖武無疆維烈天子受祜

亞終獻用咸寧

黃鐘宮

掃地南郊天神以蒞於皇君在克禋克祀交于神明元
酒陶器誠心精純非貴食味

皇帝飲福登歌用福寧

大呂宮

所以承天無過乎質天其祐之惟精惟一泰尊爰挹馨
香薦德惠我無疆子孫千億

徹豆登歌用豐寧

大呂宮

大禮爰陳為豆孔碩肅肅其容於顯百辟皇靈降監馨
聞在德明禋斯成孚休罔極

送神用乾寧

圜鐘宮

赫赫上帝臨監禋祀居然來歆昭答祖配圜壇四成神
安其位升歌贊送天人悅喜

金方丘樂歌

紫金史樂志曰方丘樂歌迎神用鎮寧之曲初獻盥

洗用肅寧之曲初獻升壇用肅寧之曲初獻奠玉幣
用億寧之曲司徒捧俎用豐寧之曲正位酌獻用溥
寧之曲配位酌獻用保寧之曲亞終升壇獻用咸寧
之曲徹豆用豐寧之曲送神用鎮寧之曲詣望燎位
用肅寧之曲凡九章其配位酌獻保寧一章詞闕詣
望燎位肅寧一章詞同初獻升壇

迎神用鎮寧

林鐘宮再奏太蔟角再奏姑洗徵再奏南呂羽

再奏詞同

至哉坤儀萬彙資生稱物平施流謙變盈禮修泰祈祭
極精誠皇皇靈睠永奠寰瀛

初獻盥洗用肅寧

太族宮

禮有五經無先祭禮卽時伸虔惟時盥洗品物吉蠲威
儀濟濟錫之純嘏來歆愷悌

初獻升壇用肅寧

應鐘宮

無疆之德至哉坤元沉潛剛克資生實蕃方丘之儀惟敬無文神其來思時歆薦殷

初獻奠玉幣用億寧

太簇宮

禮行方澤文物備舉惟皇地祇昭假來下奠瘞玉帛純誠內著神保是享陟降斯祐

司徒捧俎用豐寧

太簇宮

四階秩儀壇於方澤昭事皇祇即陰以塲潔肆於祊孔
嘉且碩神其福之如幾如式

正位酌獻用溥寧

太簇宮

蕩蕩坤德物無不載柔順利貞含洪光大籩豆既陳金
石斯在四海永寧福祿攸介

亞終獻升壇用咸寧

太族宮

卓彼嘉壇奠土方澤百辟祇肅八音純繹祀事孔明柔
祇昭格

徹豆用豐寧

應鐘宮

修理方丘吉蠲是宜籩豆靜嘉登於有司芬芬馨香來
享來儀郊儀將終聲歌徹之

送神用鎮寧

林鐘宮

因地方丘濟濟多儀樂成八變靈祇格思薦餘徹豆神
貺昭垂億萬斯年永祐丕基

元郊祀樂章

太祖初年以高智耀言徵用西夏舊樂太宗十年以
衍聖公孔元措言令各處管民官徙故金知禮樂舊
人于東平始命製登歌樂中統五年定樂名曰大成
盖取尚書簫韶九成鳳凰來儀之義其樂章皆勅翰

林院定撰然國初悉用前代舊工循習故常每有冒以舊號者太常集禮曰據孔思建本錄之皆用成字凡用寧字金曲也

元合祭天地五方帝樂章

案元史禮樂志曰成宗大德六年合祀天地五方帝降神用乾寧之曲初獻盥洗奏肅寧之曲初獻升降奏肅寧之曲迎俎奏豐寧之曲酌獻奏嘉寧之曲亞獻奏咸寧之曲終獻同徹籩豆奏豐寧之曲其奠玉

幣止載奏大呂宮送神止載奏圜鐘宮望燎止載奏
黃鐘宮俱闕曲名凡十章

降神奏乾寧

圜鐘宮三成黃鐘角一成太簇徵一成姑洗羽
一成詞俱同

惟皇上帝監德昭明祖考承天治底隆平孝思惟則禋
祀薦誠神其降格萬福來并

初獻盥洗奏肅寧

應鐘宮

明水在下鐘鼓既奏有孚顙若陟降左右辟公處止多士裸將吉蠲以祭上帝其饗

初獻升降奏肅寧

大呂宮

禋祀孔肅盥薦初升攝齊恭敬以薦惟馨肅雖多士來格百靈降福受釐萬世其承

奠玉幣

闕曲名

大呂宮

宗祀配饗肇舉明禋嘉玉既設量幣斯陳惟德格天惟誠感神於萬斯年休命用申

迎組奏豐寧

黃鐘宮

有碩斯俎有滌斯牲鸞刀屢奏血簋載升禮崇繭栗氣達尚脞上帝臨止享于克誠

酌獻奏嘉寧

大呂宮

崇崇泰時穆穆昊穹神之格思肝饗斯通犧尊載列黃
流在中酒既和止萬福攸同

亞獻奏咸寧

黃鐘宮

六成既闋三獻云終神其醉止穆穆雍雍和風慶雲賁
我郊宮受茲祉福億載無窮

徹籩豆奏豐寧

大呂宮

裡禮既備神具宴娛籩豆有楚廢徹不遲多士駿奔樂
且有儀乃錫純嘏永佐丕基

送神

闕曲名

圜鐘宮

殷祀既畢靈馭載旋禮洽和應降福自天動植咸若陰
陽不愆明明天子億萬斯年

望燎

闕曲名

黃鐘宮

享申百禮慶洽百靈奠玉高壇燔柴廣庭祥光達曙燦
若景星神之格思萬國咸寧

元親祀樂章

案元史禮樂志曰成宗大德九年以後定擬親祀樂
章降神奏天成之曲初獻盥洗奏隆成之曲初獻升
壇奏隆成之曲降同奠玉幣奏欽成之曲正配位同
司徒捧俎奏寧成之曲昊天上帝位酌獻奏明成之

曲文舞退武舞進奏和成之曲亞終獻奏和成之曲
徹籩豆奏寧成之曲送神奏天成之曲望燎位奏隆
成之曲其皇帝入中壝止載黃鐘宮皇帝盥洗止載
黃鐘宮皇帝升壇降同止載大呂宮皇帝祇位酌獻
止載大呂宮太祖位酌獻止載黃鐘宮皇帝飲福止
載大呂宮皇帝出入小次止載黃鐘宮皇帝出中壝
止載黃鐘宮俱闕曲名

皇帝入中壝

黃鐘宮

赫赫有臨洋洋在上克配皇祖於穆來饗肇此大禋乾
文宏朗被袞圉丘巍巍元象

皇帝盥洗

黃鐘宮

翼翼孝思明德洽禮功格元穹有光帝始著我精誠潔
茲薦洗幣玉攸奠永集嘉祉

皇帝升壇

降同

大呂宮

天行惟健威德御天日月龍章筭簾宮縣藁鞞尚明禮
璧蒼圜神之格思香升燔烟

降神奏天成

圜鐘宮三成黃鐘角一成太簇徵一成姑洗羽
一成詞並同

烝哉皇元丕承帝春報本貴誠于郊殷薦藁鞞載陳雲
門六變神之格思來處來燕

初獻盥洗奏隆成

黃鐘宮

肇裡南郊百神受職齊潔惟先匪馨于稷迺沃迺盥祠
壇是陟上帝監觀其儀不忒

初獻升壇奏隆成降同

大呂宮

於穆園壇陽郊奠位孔惠孔時吉蠲為饎降登祗若百
禮既至願言居歆允集熙事

奠玉幣奏欽成正配位同

黃鐘宮

謂天蓋高至誠則格克祀克禋駿奔百辟制幣斯陳植
以蒼璧神其降康俾我來益

司徒捧俎奏寧成

黃鐘宮

我牲既潔我俎斯實笙鏞克諧遵豆有飮神來宴娛歆
茲明德永錫繁禧如幾如式

昊天上帝位酌獻奏明成

黃鐘宮

於昭昊天臨下有赫陶匏薦誠聲聞在德酌言獻之上
靈是格降福孔偕時萬時億

皇地祇位酌獻

大呂宮

至哉坤元與天同德函育羣生元功莫測合饗園壇舊
典時式申錫無疆聿寧皇國

太祖位酌獻

黃鐘宮

禮大報本郊定天位皇皇神祖反始克配至德難名元
功宏濟帝典式敷率育攸暨

皇帝飲福

大呂宮

特牲享誠備物循質上帝居歆百神受職皇武昭宣孝
祀芬苾萬福攸同下民陰隲

皇帝出入小次

黃鐘宮

惟天為大惟帝饗帝以配祖考肅贊靈祉定厥崇功永
我昭事升中于天象物畢至

文舞退武舞進奉和成

黃鐘宮

羽籥既竣載揚玉戚一弛一張匪舒匪棘八音克諧萬
舞有奕永觀厥成純嘏是錫

亞終獻奏和成

黃鐘宮

有嚴郊裡恭陳幣玉大禧是承載祇載肅上帝居歆馨
香既飫惠我無疆介以景福

徹籩豆奏寧成

大呂宮

三獻攸終六樂斯徧既右享之徹其有踐洋洋在上默
默靈眷明禋告成於皇錫羨

送神奏天成

園鐘宮

神之來歆如在左右神保聿歸靈祚先後恢恢上圓無聲無臭日監孔昭思皇多祐

望燎奏隆成

黃鐘宮

熙事備成禮文郁郁紫烟聿升靈光下燭神人樂康永膺戩穀祚我丕承景命有僕

皇帝出中墻

黃鐘宮

泰壇承光寥廓元曖暢我揚明饗儀惟大九服敬宣聲
教無外皇拜天祐照臨斯屆

元社稷樂章

案元史禮樂志曰世祖至元二十年立社稷命大樂
許德良運製曲譜翰林國史院撰樂章降神奏鎮寧
之曲初獻盥洗奏肅寧之曲初獻升壇奏肅寧之曲

降同正配位奠玉幣奏億寧之曲司徒捧俎奉豐寧
之曲正位酌獻奏保寧之曲配位酌獻奏保寧之曲
亞終獻奏咸寧之曲徹豆奏豐寧之曲送神奏鎮寧
之曲望瘞位奏肅寧之曲凡十四章

降神奏鎮寧

林鐘宮二成

以社以方國有彝典大哉元德基祚綿遠農功萬世於
焉報本顯相默佑降監壇墀

太簇角二成

錫民地利厥功甚溥昭代典禮清聲律呂穀旦于差洋洋來下相此有年根本日固

姑洗徵二成

平厥水土百穀用成長扶景運宜歆德馨五祀為大千古舉行感通肸蠭登歌鎮寧

南呂羽二成

幣齊虔修粢盛告備倉庾坻京翳誰之賜崇壇致恭幽

光孔邇享于精誠休祥畢至

初獻盥洗奏肅寧

太簇宮

禮備樂陳辰良日吉挹彼樽罍馨哉黍稷濯漑揭虔維
巾及羃萬年嚴祀踰踰受職

初獻升壇奏肅寧

太簇宮

春祈秋報古今彝章民天是資神靈用彰功崇禮嚴人

阜時康雍雍為儀燔芬苾香

正配位奠玉幣奏億寧

太簇宮

地祇嚮德稽古美報幣帛斯陳圭璋式繅載烈載燔肴羞致告雨暘時若丕圖永保

司徒捧俎奏豐寧

太簇宮

我稼既同羣黎徧德我祀如何牲牷孔碩有翼有嚴隨

方布色報功求福其儀不忒

正位酌獻奏保寧

太簇宮

異世同德於皇聖造降福嘉祥衛我大寶生乃蒸民侔
德覆燾厥作裸將有相之道

配位酌獻奏保寧

太簇宮

以御田祖皇家秩祀有民人焉盍究本始惟叙惟修誰

實介止酒旨且多威德宜配

亞終獻奏咸寧

太簇宮

以引以翼來處來燕豆籩牲牢有楚有踐庸答神休神
亦錫美土穀是依成此醕獻

徹豆奏豐寧

應鐘宮

文治修明相成田功功為特殊儀為特隆終如其初誠

則能通明神母忘時和歲豐

送神奏鎮寧

林鐘宮

不屋受陽國所崇敬以興來歲苞秀堅穎雲輶莫駐神
其諦聽景命有僕與國同永

望瘞奏肅寧

太簇宮

雅奏肅寧繁釐降格篚厥玄黃丹誠烜赫肇祀以歸瞻

言咫尺萬年攸介丕承帝德

元先農樂章

按元史禮樂志曰先農樂章降神奏鎮寧之曲初獻
盥洗奏肅寧之曲初獻升壇奏肅寧之曲正配位奠
玉幣奏億寧之曲司徒捧俎奏豐寧之曲正位酌獻
奏保寧之曲配位酌獻奏保寧之曲亞終獻奏咸寧
之曲徹豆奏豐寧之曲送神奏鎮寧之曲望瘞位奏
肅寧之曲凡十四章

降神奏鎮寧

林鐘宮二成

民生斯世食為之天恭惟大聖盡心于田仲春劭農明
祀吉蠲馨香感神用祈豐年

太簇角二成

耕種務農振古如茲爰粒烝庶功德茂垂降嘉奏艱國
家攸宜所依惟神庸潔明粢

姑洗徵二成

俶載平疇農功肇敏千耦耕耘同徂隰畛田祖丕靈為
仁至盡豐歲穰穰延洪有引

南呂羽二成

羣黎力耕及茲方春維時東作篤我農人我黍既華我
稷宜新由天降康永賴明神

初獻盥洗奏肅寧

太簇宮

洄酌行潦眞足為薦奉茲潔清神在乎前分作甘霖沾

漑芳甸慎于其初誠意攸見

初獻升壇奏肅寧

應鐘宮

有椒其馨維多且旨式慎爾儀降登庭止黍稷稻粱民
無渴饑神嗜飲食永綏嘉祉

正配位奠玉幣奏億寧

太簇宮

奉幣惟恭前陳嘉玉聿昭盛儀肅雝純如南畝深耕麻

麥禾菽用祈三登膺受多福

司徒捧俎奏豐寧

太簇宮

奉牲孔嘉登俎豐備地官駿奔超進光輝肥碩蕃寧歆
此誠意有年斯令均被神賜

正位酌獻奏保寧

太簇宮

寶壇巍煌神應如響備膺咸有牲醴必芳洋洋如在來

格來享秉誠罔怠羣生瞻仰

配位酌獻奏保寧

太簇宮

酒清斯香牲碩斯大具列觴俎精意先會民命維食稗
莠毋害我倉萬億神明攸介

亞終獻奏咸寧

宮名闕

至誠攸感肸蠁潛通百穀嘉種爰降時豐祈年孔夙稼

穡為重俯歆醴齊載揚歌頌

徹豆奏豐寧

應鐘宮

有來雍雍存誠敢匱廢徹不遲靈神攸嗜孔惠孔時三
農是宜眉壽萬歲穀成丕乂

送神奏鎮寧

林鐘宮

君蒿悽愴萬靈來娛靈神具醉聿言旋歸歲豐時和風

雨應期皇圖萬年永膺洪禧

望瘞奏肅寧

宮名闕

禮成文備歌受清祀加牲兼幣陳玉如儀靈馭言旋面
陰昭瘞集茲嘉祥常致豐歲

元祀宣聖樂章

按元史樂志曰祀宣聖樂章迎神奏文明之曲盥洗
奏昭明之曲升殿奏景明之曲降同奠幣奏德明之

曲文宣王酌獻奏誠明之曲
充國公酌獻奏誠明之
曲邲國公酌獻沂國公酌獻
俱闕鄒國公酌獻奏誠
明之曲亞獻奏靈明之曲
終獻同送神奏慶明之曲
凡九章

迎神奏文明

天縱之聖集厥大成立言垂教萬世準程廟廷孔碩尊
俎既盈神之格思景福來并

盥洗奏昭明

神既寧止有孚顯若洗罍在庭載盥載濯匪惟潔修亦
新厥德對越在茲敬恭維則

升殿奏景明

大哉聖功溥海內外禮降秩宗先垂昭代陟降在庭攝
齊委佩莫不肅雍洋洋如在

奠幣奏德明

圭袞尊崇佩紳列侑籩豆有楚樂具和奏式陳量幣駿
奔左右天睠斯文繫神之祐

文宣王酌獻奏誠明

惟聖監格享于克誠有樂在縣有碩斯牲奉醴以告嘉薦惟馨綏以多福永底隆平

兗國公酌獻奏誠明

潛心好學不違如愚用舍行藏乃與聖俱千載景行企厥步趨廟食作配祀典弗渝

鄒國公酌獻奏誠明

洙泗之傳學窮性命力拒楊墨以承三聖遭時之季孰

識其正高風仰止莫不肅敬

亞獻奏靈明

廟成奕奕祭祀孔時三爵具舉是饗是宜於昭聖訓示
我民彛紀德報功配于兩儀

送神奏慶明

禮成樂備靈馭其旋濟濟多士不懈益虔文教茲首儒

風是宣

下闕

明郊祀樂章

明太祖銳志禮樂與儒臣詹同宋濂輩互相切究定
舞數釐曲名以供郊祀圜祀方丘遞及星辰社稷各
以時舉但其間有分有合有沿有革成祖至武宗百
三十年禮樂一如舊制世宗嘉靖改建南北郊闕者
補之雩祭先蠶是也裁者復之朝日夕月是也因天
事天因地事地之典昭然明備据史樂志覲縷于左
明圜丘樂章

按明史樂志曰洪武元年上勅李善長等曰朕誕膺

天命統一海宇首建郊社以崇祀事顧草創之初典禮未備卿等其酌古今之宜定議以聞善長等議遵古制分祀天地于南北郊其餘以次祀祭是年冬祀昊天上帝于圜丘迎神奏中和之曲奠玉帛奏肅和之曲奉牲奏凝和之曲初獻奏壽和之曲亞獻奏豫和之曲終獻奏熙和之曲徹豆奏雍和之曲送神奏安和之曲望燎奏時和之曲凡九章

迎神奏中和

昊天蒼兮穹窿廣覆燾兮龐洪建圉丘兮國之陽合衆
神兮來臨之同念螻蟻兮微衷莫自期兮感通思神來
兮金玉其容馭龍鸞兮乘雲駕風顧南郊兮昭格望至
尊兮崇崇

奠玉帛奏肅和

聖靈皇皇敬瞻威光玉帛以登承筐是將穆穆崇嚴神
妙難量謹茲禮祭功徵是皇

進俎奏凝和

祀儀祇陳物不於大敢用純牘告于覆載惟茲菲薦恐未周完神其容之以享以觀

初獻奏壽和

眇眇微躬何敢請于九重以煩帝聰帝心矜憐有感而通既俯臨於几筵神續紛而景從臣雖愚蒙鼓舞歡容乃子孫之親祖宗酌清酒兮在鍾仰至德兮元功

亞獻奏豫和

荷天之寵睠駐紫壇中情彌喜臣庶均懽趨蹌奉承我

心則寬再獻御前式燕且安

終獻奏熙和

小子於茲惟父天之恩惟恃天之慈內外懇懃何以將之莫有芳齊設有明粢喜極而忭奏神燕娛禮雖止於三獻情悠長兮遠而

徹饌奏雍和

烹飪既陳薦獻斯就神之在位既歆既右羣臣駿奔徹茲俎豆物倘未究尚幸神宥

送神奏安和

神之去兮難延想遐袂兮翩翩萬靈從兮後先衛神駕
兮回旋稽首兮瞻天雲之衢兮眇然

望燎奏時和

焚燎於壇燦爛晶熒幣帛牲黍冀徹帝京奉神於陽昭
祀有成肅然望之玉宇光明

洪武御製圜丘樂章

按明史樂志曰太祖洪武八年御製圜丘樂章迎

神奠玉帛進俎初獻亞獻終獻徹饌送神望燎俱
不載曲名凡九章案迎神至望燎禮凡九節或仍
用中和等名但御製樂章體例騷經唐宋以來獨
為創格抑竟有其辭而原無曲名者後方丘樂章
與此同

迎神

仰惟兮昊穹臣率百職兮迓迎幸來臨兮壇中上下護
衛兮景從旌幢繚繞兮四維重悅聖心兮民獲年豐

奠玉帛

民依時兮用工感帝德兮大化成功臣將兮以奠望納
兮微衷

進俎

庖人兮列鼎殺羞兮以成方俎兮再獻願享兮以歆

初獻

聖靈兮皇皇穆嚴兮金牀臣令樂舞兮景張酒行初獻

兮捧觴

亞獻

載斟兮再將百辟陪祀兮具張感聖情兮無已拜手稽
首兮願享

終獻

三獻兮樂舞揚敷羞具納兮氣藹而芳光朗朗兮上方
況日吉兮時良

徹饌

粗陳菲薦兮神喜將感聖心兮何以忘民福畱兮佳氣

昂臣拜手兮謝恩光

送神

旌幢眈眈兮雲衢長龍車鳳輦兮駕飛揚遙瞻冉冉兮
去上方可見蒸民兮永康

望燎

進羅列兮詣燎方炬焰發兮煌煌神變化兮物全於上
感至恩兮無量

嘉靖復定分祀圓丘樂章

按續文獻通考曰世宗嘉靖九年給事中夏言疏
古者祀天於南郊祀地于方澤以順天地之宜審
陰陽之位令國家合祭天地于南郊弗應經義乞
勅多官雜議以求至當上嘉納之乃命羣臣條奏
郊典于是雜引經史條析合祀之非伸分祀之是
名郊祀議上然之命分建二郊故圜丘樂章亦復
更定迎神奏中和之曲奠玉帛奏肅和之曲進俎
奏凝和之曲初獻奏壽和之曲亞獻奏豫和之曲

終獻奏熙和之曲徹饌奏雍和之曲送神奏清和
之曲望燎奏時和之曲凡九章

迎神奏中和

仰維元造兮於皇昊穹時當肇陽兮大禮欽崇臣惟蒲
柳兮螻蟻之衷伏承眷命兮職統羣工深懷愚昧兮恐
負洪德爰遵彝典兮勉竭微衷遙瞻天闕兮寶輦臨壇
臣當稽首兮祇迓恩隆百辟陪列兮舞拜於前萬神翊
衛兮而西以東臣俯伏迎兮敬瞻帝御願垂歆鑒兮拜

德曷窮

奠玉帛奏肅和

龍輿既降兮奉禮先爰有束帛兮暨瑤璫臣謹上獻兮
進帝前仰祈聽納兮荷蒼乾

進俎奏凝和

穀羞珍饌兮薦上元庖人列鼎兮致精虔臣盍祇獻兮
馨醴痊願垂歆享兮民福淵

初獻奏壽和

禮嚴初獻兮奉觴臣將上進兮聖皇聖皇垂享兮穆穆
臣拜手兮何以忘

亞獻奏豫和

禮觴再舉兮薦玉漿帝顏歆悅兮民福昂民生有賴兮
感上蒼臣惟鞠躬兮荷恩長

終獻奏熙和

三獻兮禮告成一念微衷兮露悃情景張樂舞兮聲鏗
鉉仰瞻聖容兮俯錫恩弘

徹饌奏雍和

祀禮竣兮精意禋三獻備兮誠已申敬徹弗遲兮肅恭
寅恐多弗備兮惟賴洪神

送神奏清和

禋事訖終兮百辟維張帝垂歆鑒兮沐澤汪洋龍車冉
冉兮寶駕旋雲靈風鼓舞兮瑞露清灑洪恩浩蕩兮無
以爲酬粗陳菲薦兮已感歆嘗香氣騰芳兮上徹帝座
仰瞻聖造兮賜羣方臣同率土兮載懼載感祇迴寶輦

兮鳳嘯龍翔誠惶誠恐兮仰戀彌切願福生民兮永錫
亨昌

望燎奏時和

龍駕寶輦兮昇帝鄉御羞菲帛兮奉燎芳環珮鏗鏘兮
羅壇壝炬焰特舉兮氣輝煌生民蒙福兮聖澤霑臣荷
眷佑兮拜謝恩光

明方丘樂章

案明史樂志曰太祖洪武二年祀皇地祇於方丘迎

神奏中和之曲奠玉帛奏肅和之曲進俎奏凝和之
曲初獻奏壽和之曲亞獻奏豫和之曲終獻奏熙和
之曲徹饌奏雍和之曲送神奏安和之曲望瘞奏時
和之曲凡九章

迎神奏中和

神德博厚物資以生承天時行光大且寧穆穆皇祇功
化順成來御方丘嚴恭奉迎

奠玉帛奏肅和

地有四維大琮以方土有正色制幣以黃敬存於中是薦是將奠之几筵臨鑒洋洋

進俎奏凝和

奉將純牡其牡黃犢烹飪既嚴登俎惟肅升壇昭薦神光下燭眷祐邦家報効惟篤

初獻奏壽和

午為盛陽陰德初萌天地相遇品物光榮吉日令辰明祀攸行進以醇醴展其潔清

亞獻奏豫和

至廣無邊道全持載山嶽所憑海瀆咸賴民資水土既
安且泰酌酒揭虔功德惟大

終獻奏熙和

庸眇之資有此疆宇匪臣攸能仰承佑助恩崇父母臣
懼鼓舞八音宣揚疊侑明醑

徹饌奏雍和

牲牷在俎籩豆有實臨之盥饗匪惟飲食登歌乃徹薦

獻爰畢執事奉承一其嚴慄

送神奏安和

神化無方妙用難量其功顯融其祀攸長飈輪六旋龍
控鸞翔拜送稽首瞻禮餘光

望瘞奏時和

牲醴制幣餽饌維馨瘞之於坎以達神靈奉神於陰典
禮是程企而望之厚壤寬平

洪武御製方丘樂章

案明史樂志曰太祖洪武八年御製方丘樂章迎
神奠玉帛進俎初獻亞獻終獻徹饌送神望座俱
不載曲名凡九章

迎神

仰皇祇兮駕來川嶽從迎兮威靈備開香烟繚繞兮神
臨御街漸升壇兮穆穆霽瑞氣兮應接樓臺以微衷兮
率職幸望聖悅兮心諧但允臣兮固請願嘉烝民兮永
懷

奠玉帛

臣奉兮以筐玉帛是進兮歲奠以常百辟陪祀兮珮聲琅琅惟南薰兮解慍映燎炎兮煌煌

進俎

庖人兮淨湯大烹牲兮氣靄而芳以微衷兮獻上曰享兮曰康

初獻

初獻行兮捧觴聖靈穆穆兮洋洋爲烝民兮永康鑒豐

年兮耿光

亞獻

雜穀羞兮已張法前王兮典章臣固展兮情悃用斟醴
兮載觴

終獻

爵三獻兮禮將終臣心眷戀兮無窮恐穀羞兮未具將
何報兮神功

徹饌

卷一百一
俎豆徹兮神熙鸞輿駕兮旋歸百神翼翼兮雲衣敬奉
行兮弗敢違

送神

祥風興兮悠悠雲衢開兮民福留歲樂烝民兮大有想
洋洋兮舉觴載酒

望瘞

穀羞玉帛兮瘞坎中遙瞻隱隱兮龍旗從祀事成兮盡
微衷感厚德兮民福雍雍

嘉靖復定方丘樂章

按明史樂志曰世宗嘉靖九年復定分祀方丘迎
神奏中和之曲奠玉帛奏廣和之曲進俎奏咸和
之曲初獻奏壽和之曲亞獻奏安和之曲終獻奏
時和之曲徹饌奏貞和之曲送神奏寧和之曲望
燎曲同寧和凡八章

迎神奏中和

俯瞻兮鳳輦來靈風兮拂九垓川嶽從兮後先百辟列

兮襄陪臣拜首兮迓迎願臨享兮幸哉

奠玉帛奏廣和

祀禮有嚴兮奉虔玉帛在筭兮來前皇靈垂享兮以納
烝民率土兮樂豐年

進俎奉咸和

穀羞馨兮氣芳庖人奉役兮和湯奉進兮皇祇歆慰臣
稽首兮敬將

初獻奏壽和

酒行初獻兮樂舞張齊醴明潔兮馨香願垂享兮以歆
生民安兮永康

亞獻奏安和

載獻兮奉觴神顏和懿兮以嘗功隆厚載兮配天民感
德兮無量

終獻奏時和

三進兮玉露清百職奔繞兮佩環鳴鳧鐘露鼓兮韻鈺
鉤願留神兮羣生

徹饌奏貞和

禮告終兮徹敢違深惟一念兮誠意微神垂博容兮聽
納恐未備兮惟慈依

送神奏寧和

禮成兮誠已伸駕還兮法從陳靈祇列兮以隨百辟拜
兮恭寅望坤宮兮奉辭願普福兮烝民

明合祀天地樂章

按續文獻通考曰太祖洪武十年上以分祭天地揆

之人情有所未安遂定議合祀十二年合祀天地於
南郊迎神奏中和之曲奠玉帛奏肅和之曲凡二章
進俎以後皆八年圜丘詞

迎神奏中和

荷蒙天地兮君主華夷欽承踴躍兮備筵而祭誠惶無
已兮寸衷微仰瞻俯首兮惟願來期想龍翔鳳舞兮慶
雲飛必昭昭穆穆兮降壇壝

奠玉帛奏肅和

天垂風露兮雨澤霑黃壤氤氲兮氣化全民勤畎畝兮
東帛鮮臣當設宴兮奉來前

明朝日樂章

按通考曰春分朝日秋分夕月此祭日月之正禮也
天地至尊故用其始而祭以二至日月次天地故祭
以二分太祖洪武三年祀朝日迎神奏熙和之曲奠
玉幣奏保和之曲初獻奏安和之曲亞獻奏中和之
曲終獻奏肅和之曲徹饌奏凝和之曲送神奏壽和

之曲望燎奏豫和之曲凡八章按史載二十一年罷
嘉靖九年復祀夕月同

迎神奏熙和

按此章同洪武二年分祀天神地祇迎神辭惟
純陽之精惟是大明二句異

吉日良辰祀典式陳純陽之精惟是大明濯濯厥靈昭
鑒我心以候以迎來格來歆

奠玉帛奏保和

靈旗莅止有赫其威一念潛通幽明弗違有幣在筐物薄而微神兮安留尚其享之

初獻奉安和

神兮我留薦必受享祀之初奠茲醴酒晨光初升祥徵應候何以侑觴樂陳雅奏

亞獻奏中和

我祀維何奉茲犧牲爰酌醴齊貳觴載升洋洋如在式燕以寧庶表微衷交於神明

終獻奏肅和

執事有嚴品物斯祭黍稷非馨式將其意薦茲酒醴成
我常祀神其來歆永言樂只

徹饌奏凝和

春祈秋報率為我民我民之生賴於爾神維神佑之康
寧是臻祭祀云畢神其樂忻

送神奏壽和

三獻禮終九成樂作神人以和既燕且樂雲車風馭靈

光昭灼瞻望以思邈彼寥廓

望燎奏豫和

俎豆旣徹禮樂已終神之云旋脩將焉從以望以燎庶
幾感通時和歲豐惟神之功

嘉靖朝日樂章

按太祖洪武戊辰增修壇壝于大祀殿東西相向
以祀日月罷分祭之典世宗嘉靖九年復朝日夕
月之祭命詞臣取洪武時舊樂歌一切更改迎神

奏熙和之曲奠玉帛奏凝和之曲初獻奏壽和之
曲亞獻奏時和之曲終獻奏保和之曲徹饌奏安
和之曲送神奏昭和之曲望燎史闕曲名凡八章
迎神奏熙和

仰瞻兮大明位尊兮王宮時當仲春兮氣融爰遵祀禮
兮報功微誠兮祈神昭鑒願來享兮迓神聰

奠玉帛奏凝和

神靈壇兮肅其恭有帛在筐兮赤琮奉神兮祈享以納

予躬奠兮忻以顯

初獻奏壽和

玉帛方奠兮神歆酒行
初獻兮舞呈齊芳馨兮
犧色駢
神容悅兮鑒予情

亞獻奏時和

二齊升兮氣芬芳
神顏怡和兮喜將予
令樂舞兮具張
願垂普照兮民康

終獻奏保和

懇勤三獻兮告成羣職在列兮周盈神錫休兮福民生
萬世永賴兮神功明

徹饌奏安和

一誠盡兮予心懌五福降兮民獲禧仰九光兮誠已申
終三獻兮徹敢遲

送神奏昭和

祀禮既周兮樂舞揚神享以納兮還青鄉予當拜首兮
奉送願恩光兮普萬方永耀燾明兮攸賴烝民咸仰兮

恩光

望燎 史闕曲名

觀六龍兮御駕神變化兮鳳翥鸞翔東帛穀羞兮詣燎
方佑我皇明兮基緒隆長

明夕月樂章

按明史樂志曰太祖洪武三年祀夕月樂章周天星
辰附迎神奏凝和之曲凡一章奠幣以下並同朝日
及洪武四年星辰別祀改以及星辰句爲惟德孔神

迎神奏凝和

吉日良辰祀典式陳太陰夜明以及星辰濯濯厥靈昭
鑒我心以候以迎來格來歆

嘉靖夕月樂章

按明史樂志曰世宗嘉靖九年復定夕月樂章迎
神奏凝和之曲初獻奏壽和之曲亞獻奏豫和之
曲終獻奏康和之曲徹饌奏安和之曲送神奏保
和之曲望瘞史闕曲名凡七章

迎神奏凝和

陰曰配合兮承陽宗式循古典兮齋以恭覩太陰來格
兮星辰羅從拜首兮迓神容

初獻奏壽和

神其來止有嚴其誠玉帛在筐清醑方盈奉而奠之願
鑒微情夫祀兮云何祈祐兮羣氓

亞獻奏豫和

二觴再斟樂舞雍雍神歆且樂百職惟供願順歸兮五

行祈民福兮惟神必從

終獻奏康和

一誠以申三舉金觥鍾鼓鈎鈎環珮琤琤鑒予之情願
永保我生民

徹饌奏安和

禮樂肅具精意用申位坎居歆納茲藻蘋徹之弗遲儀
典肅陳神其鑒之佑我生民

送神奏保和

禮備告終兮神喜旋穹碧澄輝兮素華鮮星辰從兮返
神鄉露氣清兮霓裳蹁躚

望瘞

史闕曲名

穀羞兮東帛薦之於瘞兮罔敢愆予拜首兮奉送願承
貺兮民樂豐年

明祈穀樂章

按明史樂志曰世宗嘉靖九年始祈穀于南郊帝親
製樂章命太常協于音譜迎神奏中和之曲奠玉帛

奏肅和之曲進俎奏咸和之曲初獻奏壽和之曲亞
獻奏景和之曲終獻奏永和之曲徹饌奏凝和之曲
送神奏清和之曲望燎奏太和之曲凡九章按禮記
曰孟春天子乃以元日祈穀于上帝雖非南郊正祭
而日用上辛與郊祀同世宗始行此禮重民事也

迎神奏中和

臣惟穹昊兮民物之初爲民請命兮祀禮昭諸備筵率
職兮祈洪庥臣衷微眇兮悃懇誠據遙瞻駕降兮霽色

輝歡迎鼓兮迓龍輿臣愧菲才兮后斯民願福斯民兮
聖恩渠

奠玉帛奏肅和

烝民勤職兮農事顯蠶工亦愼兮固桑阡玉帛祇奉兮
暨豆籩仰祈大化兮錫以豐年

進俎奏咸和

鼎烹兮氣馨香羞兮旨醑帝垂饗兮以歆民蒙福兮以
寧

初獻奏壽和

禮嚴兮初獻行百職趨跼兮珮琚鳴臣謹進兮玉觥帝
心欽鑒兮歲豐亨

亞獻奏景和

二觴舉兮致虔清醴載斟兮奉前仰音容兮忻穆臣感
聖恩兮實拳拳

終饗奏永和

三獻兮一誠微禮禮告成兮帝鑒是依烝民沐德兮歲

豐稷臣拜手兮竭誠祈

徹饌奏凝和

三獻周兮肅乃儀俎豆敬徹兮勿敢遲願留福兮丕而
曰雨曰暘兮若時

送神奏清和

祀禮告備兮帝鑒彰臣情上達兮感昊蒼雲程速駕兮
返帝鄉臣荷恩眷兮何以忘祥風瑞靄兮彌壇壝烝民
率土兮悉獲豐康

望燎奏太和

遙睹兮天衢長邈彼寥廓兮去上方束帛薦火兮升聞
悃悃通兮沛澤長樂終九奏兮神人以和臣同率土兮
感荷恩光

明大饗樂章

案明史樂志曰世宗嘉靖十七年定大饗樂章迎神
奏中和之曲奠玉帛奏肅和之曲進俎奏凝和之曲
初獻奏壽和之曲亞獻奏豫和之曲終獻奏熙和之

曲徹饌奏雍和之曲送神奏清和之曲望燎奏時和
之曲凡九章按月令季秋大饗帝蓋是月萬寶告成
故大饗以報天也

迎神奏中和

於皇穆清兮宏覆惟仁既成萬寶兮惠此烝民祇受厥
明兮欲報無因爰稽古昔兮式展明禋肅肅廣庭兮遙
遙紫旻笙鏞始奏兮祥風導雲臣拜稽首兮中心孔懃
爰瞻寶輦兮森羅萬神庶幾昭格兮眷命其申徘徊顧

歆兮鑒我恭寅

奠玉帛奏肅和

捧珪幣兮瑤堂穆將愉兮聖皇秉予心兮純一荷帝德
兮溥將

進俎奏凝和

歲功阜兮庶類成黍稷飭兮濡鼎馨敬薦之兮慙非輕
大禮不煩兮惟一誠

初獻奏壽和

金風動兮玉宇澄初獻觴兮交聖靈
瞻元造兮懷鴻禎
曷以酬之心忼忼

亞獻奏豫和

帝眷我兮居歆紛繁會兮五音再捧觴兮莫殫臣心惟
帝欣懌兮生民是任

終獻奏熙和

綏萬邦兮屢豐年眇眇予躬兮實荷皇天酒三獻兮心
益虔帝命參輿兮勿遽旋

徹饌奏雍和

祀禮既洽兮神人肅雍
享帝享親兮勉竭臣衷
惟洪恩兮罔極儼連蜷兮聖容

送神奏清和

九韶既成兮金玉鏘鏘
百辟森立兮威羽斯藏
皇天在上兮昭考在旁
嚴父配天兮祇修厥常
殷薦既終兮神去無方
元雲上升兮鸞鵠參翔
靈光回昭兮郁乎芬芳
載慕載瞻兮願錫亨昌
子孫黎民兮惟帝是將
於昭明

德兮永懷不忘

望燎奏時和

龍興杳杳兮歸上方金風應律兮燎斯揚達精誠兮合
靈光帝廷納兮玉帛將顧下土兮眷不忘願錫吾民兮
長阜康

嘉靖興都大饗樂章

案明史樂志曰世宗嘉靖十八年巡狩興都帝親
製樂章享上帝于飛龍殿奉皇考配迎神奏中和

之曲初獻奏壽和之曲亞獻奏敷和之曲終獻奏
承和之曲徹饌奏永和之曲送神奏咸和之曲凡
六章案世宗興獻王子正德武宗從弟武宗無嗣
迎立之時用張璠議號興獻王曰皇考故有興都
大饗禮云

迎神奏中和

仰高高之在上兮皇穹冒九圍之徧覆兮罔止西東王
者出王游衍兮必奉天顧愚臣之此行兮亶荷帡幪

初獻奏壽和

於昭帝庥兮臣感恩淵淵巡省舊藩之地兮實止承天
下情思報兮此心拳拳瓊卮蒼幣兮捧叩壇前

亞獻奏數和

樂奏兮三成觴舉兮再呈帝鑒凡微兮曰爾誠小臣頓
首兮敢不嚴于此精

終獻奏承和

臣來茲土本之思親思親伊何昌厥嗣人嗣人克昌匪

載帝之臨汝夫何因

徹饌奏永和

肅其具兮祀禮行備彼儀兮樂舞張退省進止兮臣疎
且狂沐舍仁兮何以量

送神奏咸和

王之狩兮典有禋望於維柴祀兮首重上蒼臣精罔殫
兮夙夜惶惶祇伸愚悃兮允賴恩光遙瞻兮六龍騰翔
帝垂祉兮萬世永昌

明霄祀樂章

案明史樂志曰世宗嘉靖九年夏言引古者龍見而
雩命樂正習盛樂舞皇舞請依古禮定大雩之制當
三獻禮成之後九奏樂止之時隳括雲漢詩辭制為
雲門一曲使文武舞士并舞而合歌之帝可其議十
一年定雩祀樂章迎神奏中和之曲奠帛奏肅和之
曲進俎奏永和之曲初獻奏壽和之曲亞獻奏景和
之曲終獻奏永和之曲徹饌奏凝和之曲送神奏清

和之曲望燎奏太和之曲祭畢樂舞童羣歌雲門之
曲凡十章按歷代各有雩祀明初獨不傳樂章至是
始爲全備云

迎神奏中和

於穆上帝爰處瑤宮資爾黎庶覆憫曷窮旗幟戾止委
蛇雲龍霖澤斯溥萬寶有終

奠帛奏肅和

神之格思奠茲文纁盛樂斯舉香氣氤氲精禋孔燠徹

於紫冥懇祈膏澤渥我嘉生

進俎奏咸和

百川委潤名山出雲愆陽孔熾膏澤斯屯祈年於天載
牲于俎神之格思報以甘雨

初獻奏壽和

有嚴崇祀日吉辰良酌彼罍洗椒馨飭香元功普濟時
雨時暘惟神是聽綏以多穰

亞獻奏景和

皇皇禋祀孔惠孔明瞻仰來歆拜首欽承有醴惟醑有
酒惟清雲韶侑獻肅雍和鳴聖靈有赫鑒享精誠

終獻奏永和

靈承無斁駿奔有容嘉玉以陳酌鬯以供禮三再稱誠
一以從備物致志申薦彌恭神昭景貺佑我耕農

徹饌奏凝和

有赫早曦民勞瘁斯於牲於醴載舞載詩禮成三獻敬
徹不遲神之聽之兩我公私

送神奏清和

爰迪寅清昭事昊穹仰祈甘雨惠我三農既歆既格言
歸太空式霑下土萬方其同

望燎奏太和

赤龍旋馭禮洽樂成燔燎既舉昭格精禋惟帝降康雨
施雲行登我黍稷溥受厥明

祭畢樂舞童羣歌雲門

景龍精兮時見測鷄緯兮宵懸肆廣樂兮鏗鉤列皇舞

兮蹕蹕祈方社兮不莫薦圭璧兮孔虔需密雲兮六漠
霈甘澍兮九元慰我農兮旣渥錫明昭兮有年

明太社稷樂章

按明史樂志曰太祖洪武元年太社稷異壇同壇樂
章迎神奏廣和之曲奠幣奏肅和之曲進俎奏凝和
之曲初獻奏壽和之曲亞獻奏豫和之曲終獻曲詞
並同徹豆奏雍和之曲送神奏安和之曲望座奏時
和之曲凡十六章按通典曰顓頊祀共工氏子勾龍

爲社烈山氏子柱爲稷高辛氏唐虞夏皆因之殷湯
爲旱遷柱而以周棄代之周制天子立三社祭法云
王爲羣姓立社曰太社於庫門內之西立之據八編
類纂曰明初太社太稷建于宮城之右信合古制焉
迎神奏廣和

五土之靈百穀之英國依土而寧民以食而生基圖肇
建祀禮修明神其來臨肅恭而迎

奠幣奏肅和

有國有人社稷為重昭事云初玉帛虔奉維物匪奇敬
實將之以斯為禮冀達明祇

進俎奏凝和

崇壇北向明禋方闡有潔犧牲禮因物顯大房載設中
情以展景運既承神貺斯衍

初獻奏壽和

太社

高為山林深為川澤崇丘廣衍亦有原隰惟神所司百

靈效職清醴初設顯然昭格

勾龍配

平治水土萬世神功民安物遂造化攸同嘉惠無窮報
祀宜豐配食尊嚴國家所崇

太稷

黍稷稻粱來牟降祥爲民之天豐年穰穰其功甚大其
恩甚長乃登芳齊以享以將

后稷配

皇皇后稷克配於天誕降嘉種樹藝大田生民粒食功
垂萬年建壇於京歆茲吉蠲

亞獻奏豫和

太社

廣厚無偏其體宏兮德侔坤順萬物生兮錫民地利神
化行兮恭祀告虔國之禎兮

勾龍配

周覽四方偉烈昭彰九州既平五行有常壇位以妥牲

醴之將是崇是嚴煥然典章

太稷

億兆林林所資者穀雨暘應時家給人足倉庾坻京神
介多福祇薦其儀昭事維肅

后稷配

躬勤稼穡有相之道不稂不莠實堅實好農事開國王
基永保有年自今常奉蘋藻

徹豆奏雍和

禮展其勤樂奏其節庶品苾芬神明是達有嚴執事俎
豆乃徹穆穆雍雍均其欣悅

送神奏安和

維壇潔清維主堅貞神之所歸依茲以寧土宇靖安年
穀順成祀事昭明永致昇平

望瘞奏時和

晨光將發旣侑旣歌瘞茲牲幣達于幽陰神人和悅實
獲我心永久禋祀其始於今

洪武合祭太社稷樂章

按明史樂志曰太祖洪武十一年合祭太社稷樂章迎神奏廣和之曲初獻奏壽和之曲亞獻奏豫和之曲終獻奏熙和之曲徹饌奏雍和之曲送神奏安和之曲望燎奏時和之曲凡七章

迎神奏廣和

予惟土穀兮造化工爲民立命兮當報崇民歌且舞兮
朝雍雍備筵率職兮候迓迎想聖來兮祥風生欽當稽

首兮告年豐

初獻奏壽和

氤氲氣合兮物遂蒙民之立命兮荷陰功予將玉帛兮
獻微衷初斟醴薦兮民福洪

亞獻奏豫和

予令樂舞兮再捧觴願神昭格兮軍民康思必穆穆兮
靈洋洋感恩厚兮拜祥光

終獻奏熙和

干羽飛旋兮酒三行香烟繚繞兮雲旌幢予今稽首兮
欣且惶神顏悅兮霞彩彰

徹饌奏雍和

粗陳微禮兮喜神將琅然絲竹兮樂舞揚願祥普降兮
遐邇方烝民率土兮盡安康

送神奏安和

氤氲氤氲兮祥光張龍車鳳輦兮駕飛揚遙瞻稽首兮
去何方民福畱兮時雨暘

望瘞奏時和

捧轂羞兮詣瘞方鳴鑾率舞兮聲鏗鏘思神納兮民福
昂予今稽首兮謝恩光

嘉靖初立帝社稷樂章

按明史樂志曰世宗嘉靖九年張鶚譜定帝社稷
樂歌以進詔嘉其勤迎神奏時和之曲初獻奏壽
和之曲亞獻奏雍和之曲終獻奏寧和之曲撤饌
奏保和之曲送神奏廣和之曲望瘞曲同凡六章

欽定四庫全書

御製律呂正義後編
卷一百一

卷四

按祭法云王自爲立社曰王社諸侯自爲立社曰侯社世宗自爲立社故稱之曰帝社稷也

迎神奏時和

東風兮地脈以融首務兮稼穡之工

秋祭云金風兮萬寶以充忻成兮稼

穡之功

祀神於此兮苑中願來格兮慰予衷

初獻奏壽和

神兮臨止禮薦清醇菲幣在筭初獻式遵神其鑒茲享
斯藻蘋我祀伊何祈報是因神兮錫祉則阜吾民

亞獻奏雍和

二觴載舉申此殷勤神悅兮以納祥霽兮氤氲

終獻奏寧和

禮終兮酒三行嘉茂實兮黍稷梁農事待兮豐康予稽首兮以望

徹饌奏保和

祀典告終三獻既周徹之罔遲惠注田疇迺以休貺庇茲有秋

送神奏廣和

耕耨伊始

秋祭云耕耨告就

力事豆籩粢盛賴之於此大田予

將以祀神其少延願留嘉祉副我潔虔肅駕兮雲旋普
予兮有年

明分祀天神地祇樂章

按明史樂志曰太祖洪武二年分祀天神地祇迎天
神迎地祇並奏中和之曲凡二章奠帛以後咸同朝
日按洪武二年以次祀先農日月等壇皆定奏曲之

名而朝日樂章史載洪武三年豈定名之後至此方
成歟茲以二年分祀謂咸同朝日者非肇始樂章闕
軼或史竄紀年傳訛也間有錯簡于篇例此以備參
攷

迎天神奏中和

按此章太歲尊神雷雨風雲二句與朝日迎神
詞異餘俱同

吉日良辰祀典式陳太歲尊神雷雨風雲濯濯厥靈昭

鑒我心以候以迎來格來歆

迎地祇奏中和

按此章惟地之祇百靈繽紛嶽鎮海瀆山川城隍內而中國外及四方六句與朝日迎神詞異餘俱同

吉日良辰祀典式陳惟地之祇百靈繽紛嶽鎮海瀆山川城隍內而中國外及四方濯濯厥靈昭鑒我心以候以迎來格來歆

嘉靖分祀天神地祇樂章

按明史樂志曰世宗嘉靖九年復分祀天神地祇
迎天神迎地祇並奏保和之曲凡二章奠帛以後
俱如舊按是時祀典方釐定南北郊故天神地祇
亦從分祀歟

迎天神奏保和

按此章吉日良辰祀典式陳與朝日迎神詞同
吉日良辰祀典式陳景雲甘雨風雷之神赫赫其靈功

著生民參贊元化宣布蒼仁爰茲祀典鑒斯藻蘋

迎地祇奏保和

按此章吉日良辰祀典式陳與朝日迎神詞同

吉日良辰祀典式陳靈嶽方鎮海瀆之神京畿四方山
澤羣員毓靈分隅福我生民薦茲享報鑒我恭寅

洪武合祀天神地祇樂章

按明史樂志曰太祖洪武六年合祀天神地祇迎
神奏保和之典凡一章奠帛以後咸同朝日

迎神奏保和

按此章太歲尊神雷雨風雲二句與分祀迎天神同嶽鎮海瀆山川城隍內而中國外及四方四句與分祀迎地祇同

吉日良辰祀典式陳太歲尊神雷雨風雲嶽鎮海瀆山川城隍內而中國外及四方濯濯厥靈昭鑒我心以候以迎來格來歆

明周天星辰樂章

按明史樂志曰周天星辰初附祀夕月太祖洪武四年別祀迎神奏凝和之曲奠幣奏保和之曲初獻奏保和之曲亞獻奏中和之曲終獻奏肅和之曲徹豆奏豫和之曲送神奏雍和之曲望燎奏雍和之曲其奠幣保和送神雍和詞並同朝日凡六章

迎神奏凝和

按此章濯濯厥靈昭鑒我心四句全用朝日迎神詞惟改以字為謹改來格字為庶幾

星辰垂象布列元穹擇茲吉日祀禮是崇濯濯厥靈昭
鑒我心謹候以迎庶幾來歆

初獻奏保和

神兮既留品物斯薦奉祀之初醴酒斯奠仰惟靈耀以
享以歆何以侑觴樂奏八音

亞獻奏中和

神既初享亞獻再升以酌醴齊仰薦於神洋洋在上式
燕以寧庶表微衷交於神明

終獻奏肅和

神既再享終獻斯備不腆菲儀式將其意薦茲酒醴成
我常祀神其顧歆永言樂只

徹豆奏豫和

祀事將畢神既歆只徹茲俎豆以成其禮惟神樂欣無
間始終樂音再作庶達微悰

望燎奏雍和

神既享祀靈馭今旋燎烟既升神帛斯焚巍巍霄漢倏

焉以適拳拳余衷瞻望弗及

明太歲月將樂章

按明史樂志曰世宗嘉靖八年祀太歲月將迎神凡一章史闕曲名奠帛以後俱同朝日

迎神

按此章吉日良辰祀典式陳及濯濯厥靈昭鑒我心以候以迎來格來歆同朝日迎神詞

吉日良辰祀典式陳輔國佑民太歲尊神四時月將功

曹司辰濯濯厥靈昭鑒我心以候以迎來格來歆

明先農樂章

按明史樂志曰太祖洪武二年享先農迎神奏永和之曲奠帛奏永和之曲進俎奏雍和之曲初獻奏壽和之曲亞獻奏壽和之曲終獻奏壽和之曲徹饌奏永和之曲送神奏永和之曲望瘞奏太和之曲凡十章

迎神奏永和

東風啓蟄地脉奮然蒼龍掛角照曜天田民命維食創
物有先圜鐘既奏有降斯筵

奠帛奏永和

帝出於震天發農祥神降于筵藹藹洋洋禮神有帛其
色惟蒼豈伊具物誠敬之將

進俎奏雍和

制帛既陳禮嚴奉牲載之于俎祀事孔明簠簋攸列黍
稷惟馨民力普陳先穡之靈

初獻奏壽和

九穀未分庶草攸同表為嘉種實在先農黍稷斯豐酒醴是供獻帛之初以祈感通

配位

厥初生民粒食其天開物惟智邃古奚傳思文后稷農官之先侑神作主初獻惟蠲

亞獻奏壽和

倬彼甫田其隰其原耒耜云載駟馭之間報本思享亞

獻維虔神其歆之自古有年

配位

后稷配天興于有邰誕降嘉種有哉有培俶載南畝祇
事三推侑神再獻歆我尊罍

終獻奏壽和

帝藉之典享祀是資潔豐嘉粟咸仰于斯時惟親耕享
我農師禮成于三以訖陳詞

配位

嘉德之薦民和歲豐率命率育報本之功陳常時夏其德其功齊明有格惟獻之終

徹饌奏永和

於赫先農歆此潔修于筐于爵于饌于羞禮成告徹神惠敢留餽及終畝豐年是求

送神奏永和

神無不在於昭于天曰迎曰送于享之筵冕衣在列金石在懸往無不之其佩翩翩

望瘞奏太和

祀帛牲醴先農既歆不畱不褻瘞之厚深有幽其瘞有
赫其靈曰禮之常匪今斯今

明先蠶樂章

按明史樂志曰世宗嘉靖九年始祀先蠶下禮官議
樂舞因定享先蠶樂章迎和奏貞和之曲奠帛奏壽
和之曲初獻曲同亞獻奏順和之曲終獻奏寧和之
曲徹饌奏安和之曲送神奏恒和之曲望瘞曲同凡

六章

迎神奏貞和

於穆惟神肇啓蠶桑衣我萬民保我家邦茲舉曠儀春
日載陽恭迎霞馭靈氣洋洋

奠帛奏壽和

神其臨只有苾有芬乃獻玉盞乃奠文黶仰祈昭鑒淑
氣氤氲顧茲蠶婦祁祁如雲

亞獻奏順和

載舉清觴蠶祀孔明以格以享鼓瑟吹笙陰教用彰坤
儀允貞神之聽之鑒此裡誠

終獻奏寧和

神之格思桑土是宜三繅七就惟此繭絲獻禮有終神
不我遺錫我純服藻繪皇儀

徹饌奏安和

俎豆具徹式禮莫愆既匡既敕我祀孔虔我思古人葛
覃維賢明靈歆只永顧桑阡

送神奏恒和

神之升矣日霽霞蒸相此女紅杼柚其興茲返元宮鸞
鳳翔騰瞻望弗及永錫嘉徵

明祀歷代帝王樂章

按祭法法施於民則祀之以勞定國則祀之雖在人
臣如勾龍后土有功烈于民於法當祀况歷代帝王
開創者救民取殘守文者興利除弊不但濟於一時
且有造於後世其宜祀也豈隨玉步改哉明祖初興

親製樂章祀歷代帝王宏此遠模光於前代特附羣
祀樂章後明史樂志曰洪武七年御製祀歷代帝王
樂章迎神奏雍和之曲奠帛奏保和之曲初獻奏保
和之曲亞獻奏中和之曲終獻奏肅和之曲徹饌奏
凝和之曲送神奏壽和之曲望燎奏豫和之曲凡八
章

迎神奏雍和

仰瞻兮聖容想鑒輿兮景從降雲衢兮後先來俯鑒兮

微衷荷聖臨兮蒼生有崇睟諸帝兮是臨予頓首兮幸
蒙

奠帛奏保和

秉微誠兮動聖躬來列坐兮殿廷予今願兮効勤奉禮
帛兮列酒尊鑒予情兮忻享方旋駕兮雲程

初獻奏保和

酒行兮爵盈喜氣兮雍雍重荷蒙兮載瞻載崇羣臣忻
分躍從願覩穆穆兮聖容

亞獻奏中和

酒斟兮禮明諸帝熙和兮悅情百職奔走兮滿庭陳籩
豆兮數重亞獻兮願成

終獻奏肅和

獻酒兮至終早整雲鸞兮將旋宮予心眷戀兮神聖欲
攀留兮無從躡雲衢兮緩行得遙瞻兮達九重

徹饌奏凝和

納穀羞兮領陳烝民樂兮幸生將何以兮崇報惟歲時

兮載瞻載迎

送神奏壽和

幡幢繚繞兮導來踪鑾輿冉冉兮歸天宮五雲擁兮祥風從民歌聖佑兮樂年豐

望燎奏豫和

神機不測兮造化功珍羞禮帛兮薦火中望燎庭兮稽首願神鑒兮寸衷

明祀先師孔子樂章

按歷代帝王廟功也先師孔子廟德也學記曰大學
始教皮弁祭菜示敬道也注謂有司釋奠于先聖先
師此蓋泛指古之有道者言如瞽宗祀學祖是也若
孔子之聖獨為萬世之師洪武元年以太牢祀孔子
開國宏模肇於此矣明史樂志曰洪武六年定祀孔
子樂章迎神奏咸和之曲奠帛奏寧和之曲初獻奏
安和之曲亞終獻奏景和之曲徹饌奏咸和之曲送
神奏咸和之曲凡六章

大哉聖王實天生德作樂以崇時祀無數清酤惟馨嘉
牲孔碩薦羞神明庶幾昭格

亞終獻奏景和

百王宗師生民物軌瞻之洋洋神其寧止酌彼金罍惟
清且旨登獻惟三於戲成禮

徹饌奏咸和

犧象在前豆籩在列以享以薦既芬既潔禮成樂備人
和神悅祭則受福率遵無越

送神奏咸和

有嚴學宮四方來宗恪恭祀事威儀雍雍歆格惟馨神
馭旋復明禋斯畢咸膺百福

御製律呂正義後編卷一百一